



ABDULLAH Ahmad Badawi berjabat tangan dengan Duta China ke Malaysia, Wang Chungui di Lapangan Terbang Antarabangsa Beijing semalam. Shen Guofang (dua dari kanan) dan Abdul Majid Ahmad Khan (kiri) turut berada di lapangan terbang. — Gambar BERNAMA

Lawatan PM ke China Deratkan hubungan ekonomi

28/05/04 UM ms 9

Daripada ZAINI HASSAN

BEIJING 27 Mei — Datuk Seri Abdullah Ahmad Badawi tiba di sini malam ini untuk memulakan lawatan rasmi lima hari ke Republik Rakyat China sempena memperingati ulang tahun ke-30 asas yang dirintis oleh Perdana Menteri kedua, Allahyarham Tun Razak Hussein dalam hubungan diplomatik Malaysia-China.

Para diplomat di sini menyifatkan lawatan ini sungguh bermakna dalam mengeratkan hubungan dua hala dalam bidang ekonomi dan kebudayaan, terutamanya era kegawatan globalisasi dan keganasan serantau kini.

Ketibaan Perdana Menteri diiringi isteri, Datin Seri Endon Mahmood di Lapangan Terbang Antarabangsa Beijing disambut Pembantu Menteri Luar China, Shen Guofang.

Turut menyambut ketibaan Abdullah ialah Menteri Luar, Datuk Seri Syed Hamid Albar dan isteri, Datin Seri Sharifah Aziah dan Duta Malaysia di China, Datuk Abdul Majid Ahmad Khan. Abdullah dan Endon menginap di Rumah Tetamu Negara Diaoyutai, di sini.

Pagi esok, Perdana Menteri akan merasmikan pameran 'Showcase Malaysia in China' anjuran Matrade dengan kerjasama Kementerian Pelancongan Malaysia.

Pertemuan

Abdullah kemudian mengadakan pertemuan dengan wakil Majlis Bersama Perniagaan China.

Beliau dan rombongan, seterusnya akan menunaikan solat Jumaat di Masjid Nan Xia Po, daerah Chaoyang, di sini.

Perdana Menteri kemudian akan

menghadiri Dialog Perniagaan Malaysia-China anjuran Matrade.

Upacara sambutan rasmi pemimpin Malaysia itu akan diadakan di Dewan Besar Republik Rakyat China petang esok sebelum mengadakan perbincangan dua hala dengan Perdana Menteri, Wen Jiabao. Abdullah juga akan mengunjungi Presiden republik itu, Hu Jintao.

Malaysia dan China akan menandatangani tiga perjanjian dua hala untuk mengeratkan kerjasama kedua-dua negara.

Sektor swasta pula akan menandatangani 30 perjanjian dan memorandum persefahaman (MoU) dalam pelbagai bidang usaha sama.

Pada sebelah malam, Abdullah akan diraikan dalam satu majlis jamuan negara oleh Wen Jiabao. — *Utusan*